



PRIVREDNA KOMORA KANTONA SARAJEVO
SKUPŠTINA

Članovi Skupštine Privredne komore Kantona Sarajevo i drugi učesnici u radu Skupštine, polazeći od činjenice:

- da organi Federacije BiH i BiH imaju ključne nadležnosti iz privrednog zakonodavstva koje značajno utiču na poslovanje privrede Kantona Sarajevo;
- da organi Federacije BiH i BiH sporo i neadekvatno tretiraju prijedloge privrede Kantona Sarajevo za unapređenje poslovnog ambijenta i otklanjanje barijera u odvijanju biznisa;
- da Kanton Sarajevo značajno participira u privrednom razvoju Federacije BiH i BiH, te u skladu s tim, značajno finansira rad organa Federacije BiH i BiH;

na sjednici od 17. decembra 2007. godine, jednoglasno su **u s v o j i l i**:

D e k l a r a c i j u

1. Zahtijevamo od izvršnih i zakonodavnih organa BiH da efikasnije djeluju na stvaranju povoljnijeg poslovnog ambijenta i time omoguće bolje iskorištavanje raspoloživih potencijala, razvoj konkurentnosti domaćih kompanija i njihovo efikasnije uključivanje u evropske i svjetske integracione procese. Tražimo od nadležnih organa i institucija maksimalno zalaganje, kako bi se, što prije, ispunili uslovi koji će dovesti do potpisivanja Sporazuma o stabilizaciji i pridruživanju Bosne i Hercegovine Evropskoj uniji.

Nedopustivo je da se o prijedlozima privrede za poboljšanje privrednog zakonodavstva (Zakon o akcizama BiH, Zakon o carinskoj politici, Zakon o carinskoj tarifi BiH, Zakon o javnim nabavkama, i dr.) Parlament BiH ne izjašnjava godinama i pored činjenice da primjena pojedinih zakona u praksi nanosi ogromnu štetu i privredi i društvu u cjelini.

Naglašavamo potrebu striktno primjene Pravila za konsultacije u izradi pravnih propisa ("Sl. Glasnik BiH", broj: 81/06.), kojima su ustanovljene procedure za konsultovanje sa javnošću i organizacijama po kojima postupaju ministarstva i druge institucije BiH prilikom izrade pravnih propisa. Treba obezbijediti da se ova Pravila primjenjuju i na nižim nivoima organizovanja vlasti, kako bi se unaprijedio obim i kvalitet konsultacija poslovnog sektora u izradi propisa koji se odnose na privredu na svim nivoima zakonodavne vlasti u BiH.

2. Zahtijevamo od izvršnih i zakonodavnih organa Federacije BiH da u praksi dosljedno provode utvrđena strateška opredjeljenja Vlade i Parlamenta Federacije BiH koji se odnose na stvaranje jedinstvenog ekonomskog prostora i tržišta rada, te na eliminisanje svake neujednačenosti između entiteta u oblasti fiskalne politike i ukupnog poslovnog ambijenta.

Tražimo od nadležnih organa i institucija da eliminišu svaki oblik diskriminacije i monopola između privrednih subjekata koji proizlaze iz strukture vlasništva kapitala ili drugih razloga, bilo da je riječ o javnom ili privatnom sektoru.

3. Podržavamo izvršne i zakonodavne organe Kantona Sarajevo na istrajavanju u realizaciji zahtjeva privrede Kantona Sarajevo, organizovane u Privrednoj komori Kantona Sarajevo, da se ispoljeni problemi u privredi efikasnije i brže rješavaju.

Kako mjere koje se provode iz nadležnosti Kantona Sarajevo nisu dovoljne za obezbjeđenje snažnijeg privrednog razvoja, jer je rješavanje ključnih problema u poslovanju privrede u nadležnosti viših državnih organa, tražimo od predstavnika Kantona Sarajevo koji se nalaze u izvršnim i zakonodavnim organima Federacije BiH i BiH, veće zalaganje da zahtjevi privrednika budu blagovremeno i ozbiljno razmatrani u organima Federacije BiH i BiH, s obzirom da su stavovi privrednika u saglasnosti sa proklamovanim opredjeljenjima navedenih državnih organa.



U Sarajevu 17. decembra 2007. godine

Ova Deklaracija se dostavlja predstavnicima vlasti na svim nivoima, predstavnicima međunarodne zajednice, te javnosti.